



## GOD I SALIM HELPIM I KAM—JISAS KRAIS—PIKININI BILONG GOD

**As bilong dispela tok:** Bilong soim ples klia God em i Triwan, God Papa, God Pikinini na God Holi Spirit. Dispela stori bai kliaim dispela tok long man bilong kisim bek ol manmeri, em bai i stap Pikinini Bilong God i kamap olsem man. Wanpela yangpela meri Juda, nem bilong em Maria, bai i karim em na em i kisim bodi olsem ol man bilong graun. Man bilong kisim bek ol manmeri bai i stap God na man wantaim.

2 Korin 13:14; Maika 5:2; Aisaia 7:14, 9:6; Luk 2:1-20



**Wanpela pikinini man i kamap pinis long yumi, em wanpela pikinini God i givim long yumi. Em bai i stap king bilong yumi, na em bai i gat ol dispela nem, "Man bilong givim gutpela tingting tru" na "God i gat bikpela strong" na "Papa bilong i stap oltaim oltaim" na "King bilong kamapim gutpela sindaun na bel isi." Aisaia 9:6**

Daniel na Anna i save i no gutpela long tupela i lusim miting na i go. Tupela i gat planti kwesten bilong askim Pol na Robert. Tupela i les long sindaun klostu long fransait, tasol Robert i pulim tupela i go. Ol yut i singim ol nupela song Daniel na Anna i no bin harim bipo. Anna i amamas long harim ol song, tasol Daniel i laik Pol i hariap na autim stori bilong God.

Pol i go long fransait bilong ol yut na i tok, "Mi save yupela i wet long harim dispela stori bilong Maria i laik karim dispela man God i bin makim bilong kisim bek ol manmeri. Mi laik kliaim sampela tok pastaim, na bai yupela i klia long Kraiss em i husat na bai yupela i harim sampela nupela pasin bilong God. God em i Triwan. Dispela tok Triwan i makim 3-pela samting. God em i Triwan na wan wan insait long 3-pela i wankain na i gat wankain strong na save. I gat wanpela God, tasol insait long dispela nem God i gat 3-pela nem wan wan. Ol tok tru bilong pasin bilong God mipela i skulim yupela pinis long en, em i makim pasin bilong 3-pela wantaim. Yupela i ken lukim dispela piksa ya. Long dispela piksa, i gat 3-pela lain. I no gat wanpela lain i longpela na i winim tupela arapela. Nogat. 3-pela i wankain tasol. Mi bin raitim nem bilong God namel tru long ol 3-pela lain. Long antap, mi raitim nem olsem God Papa, na daunbilu mi raitim God Pikinini, na long hapsait mi raitim God Holi Spirit. Em ol 3-pela nem i stap insait long dispela Triwan God. 3-pela wantaim i stap oltaim oltaim. I no gat taim ol i bin kamap long en na i no gat wanpela taim bai ol i dai. I no gat taim bilong wanpela samting i bin mekim kamap 3-pela na i no gat taim meri i karim ol." Robert i tok isi isi long Daniel na i tok, "Mi save dispela tok i hat long klia long en, tasol long buk Baibel, God i tok dispela tok i tru, olsem na mi bilipim tasol."

Pol i laik stori moa, tasol em i laik kliaim tingting bilong liklik tok em i bin skulim ol long en bipo na em i tok, "Bipo, yumi lukim tok bilong God na mi bin tokim yupela long Kraiss, man bilong kisim bek ol manmeri i mas i stap stretpela man tru i no gat sin. Na yupela i save, ol lain bilong Adam i gat sin, olsem na i no gat wanpela lain bilong Adam i ken kamap Kraiss. Long dispela as tasol, God i salim Kraiss, man i no gat sin, i go daun long graun. Bipo tru, God i makim pikinini bilong em i kamap Kraiss, na Pikinini bilong em i wanbel long dispela." Pol i lukim wanpela pikinini i apim han bilong em na em i tok, "Jon, yu gat wanpela kwesten?" Na Jon i tok, "Bipo, yu tok God em i spirit na em i no gat skin bun olsem mipela, olsem na olsem wanem Pikinini bilong God i ken i kamap Kraiss long dispela graun?" Pol i amamas long Jon i bin askim dispela kwesten na em i tok, "God i bin wokim rot bilong dispela tu. Pikinini bilong God bai i kamap man bilong graun. Na bilong kamap man bilong graun, Maria bai i karim em. Em i makim olsem Pikinini bilong God bai i stap God na man wantaim. Wanpela profet, Aisaia, i bin tokaut long dispela 600 yia bipo long Maria i karim Jisas."

Wanpela pikinini meri i lusim tingting long apim han bilong em pastaim na em i tok, "I luk olsem Maria i mas wanpela naispela meri tru na God i makim em." Pol i no laikim ol pikinini i ting Maria i no gat sin. Em tu i wanpela pikinini bilong Adam na i gat sin. Olsem na Pol i tok, "Ating Maria i mas amamas tru long God i makim em bilong karim Kraiss, tasol God i no lukim stretpela pasin bilong Maria. Nogat. Em i makim em long laik bilong em yet. I luk olsem Maria i bilipim dispela tok God i bin promis long Abraham long salim man bilong kisim bek ol manmeri. Na God i save long olgeta samting, olsem na em i save Josep na Maria bai i bilipim ol promis em i mekim long tupela. God i save Josep na Maria bai i wanbel long dispela rot em i wokim bilong makim tupela bilong kamap papamama bilong Kraiss. Save bilong God i no popaia. Josep na Maria i no klia long olgeta samting God i laik mekim, tasol tupela i bilipim tok bilong God."

Pol i save dispela tok bilong Jisas i kamap pikinini i hat long ol mangi i klia long en, olsem na em i tok, "Maria i no gat man bilong em yet na em i no bin slip wantaim man, olsem na Holi Spirit i mekim narapela pasin long em. Em i samting strong bilong God tasol inap mekim. Josep bai i lukautim Jisas olsem pikinini tru bilong em, tasol Jisas i no gat wanpela papa tru bilong graun. God i stap Papa bilong Jisas. Taim Maria i karim Jisas, em bai i nogat sin olsem ol pikinini bilong graun. Na wankain olsem profet bilong God i bin tokaut bipo tru, Maria bai i karim Jisas long wanpela taun ol i kolim Betlehem." Daniel i harim na em i laik tok isi isi long Robert, tasol planti mangi na Pol i harim tu. Daniel i tok, "Olaman! Em i narakain stori!" Pol i harim, olsem na em i tok, "Taim skai i lait na God i salim wanpela ensel bilong autim tok long ol man bilong lukautim sipsip olsem Jisas i kam pinis, ol tu i bin kirap nogut na ol tu i ting em i narakain stori. Ol i bin wetim God i salim Kraiss i kam, na nau em i kam pinis." Em i tok olsem na wanpela liklik meri i tok, "Sapos wanpela ensel i kam toktok wantaim mi, mi tu bai i kirap nogut. Ating mi bai ting mi lukim wanpela driman samting." Na Paul i tok, "Tru. Tasol sapos yumi lukim skai i pulap long planti ensel tru i kam bung wantaim dispela wanpela ensel i bin tokaut pastaim long ol man bilong lukautim sipsip, na ol i singim song na litimapim nem bilong God, ating bai yumi kirap nogut tru. Em i bikpela taim bilong ol ensel tu na ol man bilong lukautim sipsip wantaim. Taim yumi ritim dispela stori long buk Baibel, ol man bilong lukautim sipsip i save ol i lukim ensel tru tru. Ol i no ting ol i lukim driman. Nogat. Ensel i tokim ol long bebi i stap long Betlehem, olsem na ol i siksti i go long Betlehem bilong lukim dispela pikinini bilong kisim bek ol manmeri. Ol i go lukim na ol i save dispela tok bilong ensel i tru. Olsem na ol man bilong lukautim sipsip i tokaut long olgeta manmeri tu. Na taim ol manmeri i harim dispela stori bilong ol man bilong lukautim ol sipsip, ol tu i kirap nogut.

### Ol Kwesten

1. Dispela tok, God i Triwan, i gat wanem as? Husat husat i stap insait long dispela nem Triwan?
2. Kraiss, man bilong kisim bek ol manmeri, i kam long wanem hap? Husat i putim em long bel bilong Maria na em i karim?
3. Bilong wanem Kraiss i mas kam daun long Heven.
4. Bilong wanem God i makim Maria bilong karim Kraiss, man bilong kisim bek ol manmeri?
5. Dispela tok, God i stap oltaim oltaim, i gat wanem as?
6. Bilong wanem Kraiss i no gat sin taim Maria i karim em?
7. Em i no gat sin, tasol wanem narapela pasin i kamap long Maria i no bin kamap long ol arapela meri i gat bel na i karim pikinini?
8. Ol ensel i autim wanem gutpela tok long ol man bilong lukautim ol sipsip?
9. Dispela stori i skulim yumi long wanem pasin bilong Kraiss, man bilong kisim bek ol manmeri?